

四庫全書

集部

欽定四庫全書

集部

東里文集卷十三

四

詳校官檢討

臣羅國俊

中書

臣

劉源溥覆勘

總校官進士

臣楊懋珩

校對官主事

臣張培

謄錄監生

臣華春芳

欽定四庫全書

東里文集卷十三

明 楊士奇 撰

神道碑

奉天靖難推誠宣力武臣特進榮祿大夫柱國
前軍都督府左都督永康侯追封蔡國公諡忠
烈徐公神道碑

公諱忠字仲達姓徐氏世家廬州之合肥父諱用元季
守宣城我太祖皇帝兵至宣率衆歸附命仍其職遂從

征討以功實授管軍百戶從守南昌進武畧將軍河南
衛副千戶洪武壬戌自陳老疾命公代之丁卯從征北
邊至喀爾喀之地還城大寧無幾調大寧備禦戊辰從
征金山之寇之爲邊患者屢戰敗之獲其馬牛輜重賜
白金鈔幣庚午運兵餉數十萬斛赴溫口遂從征鼎爾
布哈大敗敵衆俘獲其人口萬餘總兵遣公護送入關
公悉心撫卹俘者如歸陞濟陽衛世襲指揮僉事乙亥
城懷安萬全丙子率兵從征北邊至驢駒河而還丁丑

往填開平已卯太宗皇帝舉北平之師公首從義旗克
密雲克雄縣真定取永平克大寧還戰鄭村塢取廣昌
薊州戰白溝河皆奇功進攻濟南克滄州大戰東昌及
夾河攻彰德破西水寨克東阿東平汶上大戰靈璧遂
從渡淮及江至京師公臨戰奮勇百夫莫當出入敵陣
率在衆先白溝之戰敵揮刃斫公兩指未殊公自斷指
擲地裂衣帛裹創仍奮進戰其馭士卒撫卹誠至人人
歸心而號令嚴明所過無擾上行師恒飭諸將毋妄殺

曰吾奉天弔民厲民違天何望有濟公承命顓顓惟執
兵迎拒者不容而誘諭招徠綏撫降附多効力焉其以
功進官自指揮同知歷都指揮僉事授奉天靖難推誠宣
力武臣特進榮祿大夫柱國前軍都督府左都督永康
侯食祿千一百石子孫世襲賜誥券追封曾祖六二祖
七九及考皆永康侯曾祖妣陶祖妣王妣張皆永康侯
夫人永樂己丑暨癸巳車駕巡狩北京仁宗皇帝監國
上以公敦厚老成留之南京兵政一以任公公小心寅

畏清靜簡易上下咸宜之一日夙興盥櫛衣冠坐都督府得風疾遽卒癸巳八月二十四日也上在北京聞訃震悼輟視朝一日遣官賜祭給賻命有司治喪葬追封蔡國公謚忠烈并加封其三代考皆蔡國公妣皆蔡國夫人配亦蔡國夫人仁宗皇帝在東宮遣祭賚賜甚厚公沉毅質恪有孝行旦暮出入必先詣家廟事繼母敬愛兼至小有訓責必跪受雖貴不變所得上賜必謹視之約已守法未嘗有過接人恭謙和氣滿容語簡而誠

洞見底裏春秋五十有二而卒卒之歲十一月二十七日葬江寧縣安德鄉長岡之原子男二安山壽安襲侯爵女二長適指揮使孫竑次適沐儼安奉國子祭酒具公泰所述事狀求文刻神道之碑士奇與公同朝十有餘年後同侍監國相厚知公之行加詳故為序而銘之銘曰桓桓徐公為時虎臣襲家之勲奮武以振天啟聖明義旗爰舉挺誠來從股肱之輔皇麾所指公迅前驅誰抗誰禦拉朽折枯神武不殺公行聖志來迓來歸

撫綏勤至仁施如春義行如秋公實左右威懷並流
既安氛翳咸廓宗社再隆褒功命爵悃悃無華厚重
靡遷貂蟬充廷孰愈公賢鑒輿北狩聖儲監國峙武以
衛孰優公德肅肅小心溫恭靖嘉歸焉老成為國之華維
孝維忠在公允蹈宜貴宜富昌不耆耄都門之南聿崇
起墳過者下車眎茲刻文

贈資善大夫都察院右都御史兼詹事府詹事
向公神道碑銘

洪武二十四年十月十一日南昌之進賢處士向公允
恭卒其葬也前江西儒學副提舉熊釗先生銘之後三
十有四年為洪熙元年天子推恩大臣時處士之子寶
為資善大夫都察院右都御史兼詹事府詹事遂贈其
祖若考散官官皆如寶祖妣妣皆夫人寶奉命書薦告
已退具其考之事狀以告士奇曰惟上之大賜與先考
所以身致今之光榮者皆不敢以泯幸為之文將刻石
墓道以永示我後人按狀向宋左僕射同平章事謚文

簡諱敏中之後文簡曾孫子蔚以欽聖憲肅皇后家從
高宗南渡其子性事孝宗官至大中大夫封魏國公贈
少師少師生朝奉大夫士煜朝奉生臨川縣丞公道娶
進賢許氏因葬其父進賢遂家焉臨川四世至居敬娶
胡氏生熙載熙載娶羅氏生雲翔雲翔娶章氏公之父
母也自公以上三世皆有厚德不志榮利而家秉禮度
肅然他之名世族者不及也公諱祖紹允恭其字幼聰
慧七歲讀書涉通大義且強敏善記其事父母孝愛其

弟厚貲業恣所取弟死無子選族子爲之嗣其於人賙窮乏矜憫無告恒汲汲嘗歲歉鄉萁死甚衆時田麥且熟有盜刈之者公得盜及麥不忍發或教公執盜送官當併得其田廬公曰凶年民果得已爲盜耶且困人於厄而奪其所有吾所不能人以是服其長者國初安仁土豪楊漢既以饒信建昌內附而其下所過猶縱剽殺厲民公隣人陳氏無子唯一女始笄爲所剽父母痛憤然莫敢誰何公毅然以其人訴行省卒還之所爲義舉

多類此里宴會有暴發少年倚賢鉅不讓直入據上座
公怒戟手數其過切責之少年慚懼趨降請謝公亦改
容懽遇之盖公襟宇洞達遇義所不可剛正直奮不畏
彊禦而彼能改過即霽顏開納無所凝滯焉人有忿爭
不相下率走公求直平生好德樂義邪僻之念不作於
心非法之言不出諸口閒居儀貌儼肅子弟侍側者皆
謹自飭如侍嚴師不敢稍縱寶始就學勵之曰立身必
以儒及仕又曰守官必以道寶嘗坐累逮繫公不色憂

有以爲問者曰吾兒所存心行已當遠大此不足爲累
至今鄉人號明知子者必推公蓋春秋七十而卒會葬
千有餘人斯亦可以觀其行矣夫人熊氏邑儒家子有
孝敬儉勤之德所以爲婦爲母者族姻蓋視以爲法先
十八年卒子男一即寶女二長適王次適熊皆先卒孫
男五劉孫早卒可觀可規可覲可寬女四曾孫男一寶
洪武乙丑進士兵部主事員外郎應天府尹以至于今
官歷事列聖四十有餘年恭慎之行冰蘖之守寬厚之

施夷險一致魯無君子斯焉取斯要其本諸家者深矣銘曰

顯顯宋臣曰向文簡扈蹕來南向以威畹逮臨川丞
啟家進賢繩繩振振式繁子孫有閱高門有嚴禮度
居處執恭出入東序世德之承誦法鄒魯進賢七葉
曰允恭甫維允恭甫外方內仁志之所存惠逮于民
其潜在下隨所分力民之懷之孰匪厥德其嗣奮揚熙
帝之載推考之志而施逾大帝曰俞哉覃澤所自龍章
褒敎日星輝麗旁冠犀犖靈颺翼騄歲時薦祀來蒞

卷十三
來歆行有報施茲維德台墓道琢辭來世是告

奉天翊衛推誠宣力武臣特進榮祿大夫柱國
追封平江侯謚恭襄陳公神道碑銘

太宗皇帝初自北藩舉兵內向至江上都督陳公瑄具
舟迎濟事平上正大統錄功賜公奉天翊衛推誠宣力
武臣特進榮祿大夫柱國封平江伯賜誥券陳氏家合
泐其先世具余所著其先公墓碑公字彥純自少穎敏
不凡好善惡惡內篤孝行洪武中侍父官成都習兵畧

精騎射以武臣子選侍大將嘗從出郊遙望孤鴈襍我
羣命衆從者射不中最後命公發一矢斃之有鵠翔于
上命公射應弦而墜自是屢試皆奇中衆大服而公不
自爲能朝廷命總兵者作蜀府宮城遣將伐材於山所
行失律且材不中度又所經瘴地士多死總戎察公可
用遂命之公善撫綏明號令別取善道七百里以入先
期而還士不病所得材皆適用總戎者嘉之又命董繕
作具有條理遂從征南番宕州中亭及散毛鎮南咸建

勞績代父職爲成都右衛指揮同知父坐舊累謫戍遼陽公伏闕奏請代行特詔父子並免復職衛卒數輩驟設狙詐狹制上下爲衆患公次第悉去之善類以安從征越雋討建昌酋長伊埒特穆爾踰梁山平天星寨破寧番諸蠻駐西河口諭降夷人數千從總帥復征鹽井平三山寨及小伯夷進攻卜木瓦寨據要害立堡以斷賊路官軍分三隊進公居中已而左右兩隊弗支奔還公所統僅百餘人冒險先登賊數千圍公公下馬率衆

且射且斫賊疲稍却公亦傷足裹創進戰自己至酉賊
敗走公全所統而還復從征餘寇賈哈喇時寇衆數萬
據嶮以拒官軍分三道公軍後進由番西涉打中河得
間道乃出奇兵作浮梁渡河既渡撤梁以固士志遂壓
寇境寇憑嶮迎敵一日十三戰奪其嶮明日復力戰凡
七合寇大敗遂入其壘簡銳卒出哨令望見前軍旌旗
即舉砲俾知已敗寇仍遣五百軍斷寇走路寇窮出降
械送賈哈喇京師撫輯其餘衆公及麾下皆被陞賚從

蜀獻王巡邊招撫邊夷兼理茶馬之政邊人悅戴灌口
都江堰壞民苦水患公修其隄防躬督工作爲堅久計
矜恤無告出貲置義田二百畝於成都積所入租凡貧
不能衣食不能婚嫁及死不能斂葬者皆給之會雲南
兵征百夷以功陞四川行都司都指揮同知遂進右軍
都督府都督僉事太宗皇帝知公才可任時北京軍儲
不充命公歲董運百萬石道海給之公措置井井勦建
百萬倉於直沽尹兒灣城天津衛籍兵萬人戍守公善

任使均勞逸秋豪無取於下凡漕徒姦弊掃除一清漕
舟所經海島夷人畏憚官軍悉閉匿公下令俾出為市
而遣官監臨平其直軍無敢譁人兩便之舟還值倭寇
劫沙門島公率衆追至朝鮮境上焚寇舟殆盡寇以殺
溺死者甚衆奉命率舟師於閩海備倭寇者三海溢垠
沒隄岨起揚之海門歷通泰北至鹽城凡八百里奉命
以四十萬卒修之航海至者茫洋莫知所停泊往往膠
淺公於太倉相可泊處以二十萬卒築高丘二十丈

延亘十里爲表識衆便之稱寶山事聞上親製文樹碑
焉既建北京罷海漕浚濟寧臨清河通南北往來仍屬
公董餉運公建議造淺艫二千艘初歲運二百萬石爲
之有方後增至五百萬石國用以足若䟽清江浦引水
由管家湖入鴨陳口達淮以免淮河風濤之患就管家
湖築隄亘十里以便引舟浚儀真瓜洲二埧潮港之堙
鑿呂梁徐州二洪巨石以平水勢築沛縣刁陽湖濟寧
南望湖長隄開泰州白塔河通大江築高郵湖隄隄內

鑿渠亘四十里以通舟南北造梁以便陸行自淮至臨
清相水勢高下建牖四十有七以時啓閉皆舟楫通行
永遠之利於淮濱作常盈倉五十區以貯江南輸稅於
徐州臨清通州皆建倉以便轉輸慮漕舟昧河深淺自
淮底通州濱河置舍五百六十八所舍置卒俾導舟可
行處緣河隄鑿井樹木以便夏月行者凡於事慮之周
而爲之果仁宗皇帝初臨御下詔求言公首言七事大
槩謂南京國之根本宜爲久遠鞏固之計選將益兵以

嚴守備長民長兵皆宜擇賢能然後政舉而下不失所
賢能在推舉推舉在覈實乞選朝臣之公正者分巡天
下考察百司政事得失進廉能黜貪鄙則官得人而治
可興今府州縣學教官多不得人乞令風憲考察罷黜
別選今中外軍伍多缺蓋由所管頭目私役擾害不勝
致其逃逸乞勅都府兵部都司嚴切禁約就行清理老
疾者令戶丁代逃逸者責限追捕戶絕者驗實除豁伍
籍又邊防之要在兵食足近歲如開平等處城不足兵

兵不足食所守何由完固乞選武臣之有方畧者授以
精兵足其衣食給之堅利器械俾日教習如有沃壤令
兼務耕守今漕運惟江西湖廣浙江及蘇松諸郡去北
京甚遠漕河又有洪牒淺凍之阻往復踰年襍費數倍
正糧上逋公租下妨農務乞自今令運於近便淮安徐
州等處收貯別令官軍運至北京則民力可蘇農務不
妨各處官軍每歲漕運畢財力殫乏到家又修理壞船
運來歲糧勞勤可憫其所管頭目又加別役以重困之

乞行禁約今後漕運軍士不得再有別役馬船快船惟
二三百料者可行於漕河所載不過五六十石每船已
有額設水夫今又於緣河拘集軍民聽候其至接遞聽
候日久衣食艱難有至行丐者乞自今罷之上覽奏嘉
嘆命有司咸即施行賜勅獎諭有老成忠愛之誠之褒
加之重賚賜誥追封其曾祖省三祖重一考聞皆平江
伯曾祖母孫祖母朱嫡母王生母王故妻湯皆夫人命
子孫世襲宣宗皇帝臨御命公鎮守淮安兼督漕運公

至察宿弊之爲民厲者悉革之豪猾姦宄皆斂避境內
以寧時已嬰疾而躬勤旦莫靡有滯事疾間入朝深被
嘉勞賜宴賚還至淮安無幾疾復作上聞特勅勞問時
子儀在侍衛令挾醫馳驛往侍竟薨宣德癸丑十月十
一日也春秋六十有九訃聞上悼嘆輟視朝一日追封
平江侯謚恭襄賜祭命工部營葬公爲人閭與英毅弘
度偉畧稠人廣會譚論亹亹倫輩推服公餘披閱載籍
考知往古成敗治亂之故喜近逢掖士時相講議善交

際能推利爲義所至以濟人爲心多所建置人用德之
不忘家有樂善堂恒舉鄒孟氏仁義忠信樂善不倦之
語以勉子孫配某氏封夫人子男五佐襲平江伯後公
數歲卒次儼次儀今爲勲衛好文事精武畧次倫次侃
女三李芳江陰衛指揮同知張英其壻也一未行孫男
三裕今襲平江伯祐祿女七公葬以薨之明年三月
墓在江寧縣大山之原余與公同朝三十餘年相知且
好於是儀以狀求著神道之碑故按狀叙而銘之銘曰

繫公挺出何桓桓武無勇智追前聞材藝夙試卓寡倫
我冠三品承考勲蠻谿獠峒獫狁羣負嶮弗擾寧且趨
公奮掃刮迅拔塵湔滌腥穢寧邊民有截譽望齊峨岷
歛微來東衛宸垣遭承興運效駿奔錄勞䟽封昭鴻恩
貂蟬擊玉衣繡麟報賜志企古蓋臣單心畢慮靡夕昕
滄溟茫洋渺涯垠歲漕萬艘奄然臻有梗于海威赫震
斬鯨戮鱷焚甲鱗崇表海岫亘長雲雲章龍彩天垂文
南賦北貢艱以辛踰淮歷濟底天津䟽堙鑿堅劬且勤

坦行如砥戚者忻猗嗟公薦孝與仁厥施諸時績弗泯
愛國亦有嘉謨陳功載冊府被後昆大江之陽歸有墳
太史銘之昭不刊

故驃騎將軍左軍都督府都督僉事王公神道
碑銘

正統四年八月十七日左軍都督府都督僉事王公瑜
以疾終于通州之驛館訃聞上悼惜遣禮部尚書賜祭
加賻勅有司治喪葬京師親王遣祭公侯六卿皆詣弔

祭既葬其子縗經奉其弟瑄所述事狀踵門泣拜求書
墓道之石余爲之歎曰忠義爲臣之大節如王公之挺
特獨奮忘其身以爲宗社計豈非卓然大丈夫哉我公字
廷器始代父長五十夫選隸趙簡王護衛永樂癸卯五
月太宗皇帝微不懌數日未出見羣臣仁宗皇帝在東
宮軍國政務悉啟聞施行邪僻傾險之徒不得騁其私
咸所不便簡王時留北京敬修孝弟其護衛指揮孟
賢等十數輩潛結歷官王射成等及內侍養子共搆

邪謀欲俟宮車晏駕矯詔從中出立簡王而已得志焉
竇秘不令簡王知蓋慮不從即事敗齎粉而尸其謀者
公姻家高以正布置已定高密以語公公駭曰此天壤
間極惡大罪鬼神所不貸者柰何甘為覆家滅祀計高
不聽又涕泣戒之高怒而慮其泄也謀害之遂詣闕入
疏上覽之初疑其詐諛曰豈應有是反覆詰難衆爲公
危公辭色不少挫既捕賢等至上親問狀得其邪謀本
末及所造偽詔立誅以正射成及內侍養子陞公遼海

衛千戶後賢等皆伏誅召還又陞懷遠將軍錦衣衛指揮同知有旨戒其同官事必關白瑜勿謾公正直坦明每事求當大體所隸官校心歸之無間言見知於上宣德中陞都指揮僉事命署左軍都督府都督僉事克左副總兵佩漕運印總督江南民賦之輸北京者無守淮安正統初寔授驃騎將軍左軍都督府都督僉事在淮安承平江伯之後謹守其遺法不變展誠布公虛已從善處同官能讓淮安兵民雜處橫兵素怙勢厲民

公至首下令禁戢爲政重倫理有富民親在而與弟競
產訴於公者公曰爾富而委親之養於弟而又訟弟孝
友二行皆缺矣杖而斥之人服其明臨政務寬有二卒
盜敗舟一板梟司坐盜官物抵死以質公公曰兩卒之
命抵一敗舟板耶改坐不應平恕多類此好以義感人
有婦翁以白金畀贅壻爲市取息者壻不善市不能償
索之急欲自經翁執以告又有自顯官歸次資索豐厚其
弟有宿逋貧不能償索逋者急弟乞償於兄纖芥不得

公聞之皆為代償荒歲糞廩多所賑活嘗覽農桑撮要
嘆古人用心民事遂益其所未備者十數事刻梓以傳
滇南有浮圖人鼓其師之說所至惑民淮安典兵者與
之暱為建刹居之而廣教地為民厲公咎浮圖人逐之
悉復民地淮人死不葬焚屍而委於水公相城外多空
地畀民以葬遂革焚屍之俗築室所居之側延師以訓
武臣子弟閒暇躬往督勵如己子弟然亦時蒞郡縣學
敦勉博士弟子喜近儒生時與講論前言往行至忠

義事慨然有嚮慕意若涉悖亂即義形于色家居敦孝悌之行仁其族姻周且厚所至以愛人為心雖貴嚴於自守於利不一毫非分取服用清約門無私謁致勤於公雖病不廢至是以計事詣北京力疾入見又明日出視漕舟竟不起享年五十有七公山陽人其先見余所著其考墓文曾祖文貴祖彥達父銘母成氏繼茹氏朝廷推恩以其官品贈二代并封其元配許繼吳皆夫人子男五壻均均塾堪女一未行其墓在宛平縣狼山村

之原銘曰

人道所重綱與常忠義寔關世範防偉公志勁百鍊鋼
上衛宗社尊天王挑摘姦宄發潜萌狐虺斬馘妖魅敷
嘉忠褒貞騰寵章簡廉任能升周行攄勤效智挺厥誠惠
流績建譽孔揚大星俄隕吁可傷榮哀始終炳煌煌我
我崇丘斯永藏龍泉下閔含精光升貫牛斗逝不亡

東里文集卷十三

欽定四庫全書

東里文集卷十四

明 楊士奇 撰

墓碑銘

嘉議大夫都察院左副都御史邵公墓碑銘

公諱玘字以先姓邵氏其先居睦至仁仲始徙金華蘭溪之椒峯孫吉甫宋國子助教公高祖也曾祖伯玉祖巨川父子祥曾祖以下皆不仕母盛氏公幼已負志挺特不與凡兒狎就學外傳勤勵不懈以詩經中永樂乙

酉浙江鄉試明年中禮部會試廷試賜同進士出身賜
勅歸進學又明年召至授湖廣道監察御史慨然以功
業自期號貞白生以見志明憲紀究律意而用法平恕
至遇渠奸巨猾爲民厲者亦不少寬假聲譽遂起嘗巡
按江西廣東福建克振風裁時仁宗皇帝監國尤所簡
知間刑部都察院大理寺闕堂上官率命公署有重獄
數以付公公感上知遇夙夜盡心每事親理有所顧問
應對詳明一時老成多推讓之陞江西按察使先是南

昌新建二縣苦上官和買長里役者供一日費家爲之
空公視事之日立罷之懽聲溢路而私不便者皆側目
焉然眎公自用簡儉終亦莫敢一語積歲訟牒填委悉
取省閱擇其尤甚者自聽斷餘悉歸郡縣滯獄一清在
江西五年政用肅然丁內艱去服闋改福建按察使治
職如江西而有司之務倍繁稍濟以寬宣德三年召爲
南京都察院左副都御史時南京諸司緩弛御史尤縱
公奉勅簡擇奏黜其不肖及庸懦者殆半繼奉勅偕六

部長貳簡黜諸司之不肖庸懦者綱紀復振爲人外肅
內寬仕二十餘年所歷中外皆風憲於條制故寔與夫
施措之宜默識明習所至糾劾官邪舉大體而畧瑣細
家居有孝行既仕得祿時惟母在迎奉就養極其愛敬
母喪哀毀所居產瑞芝者再鄉里以爲孝感處朋友寮
屬必約之於義有所薦舉必清介士其廉潔之操蓋終
始一轍宣德五年正月十二日夙興衣冠坐得風眩疾
遽卒訃聞上爲悼嘆遣行人賜祭其文有持身清廉用

法敬慎及振舉綱紀屏黜儉邪之褒又命有司營葬事
兩京大臣君子皆致弔祭公享年五十有六配方氏繼
張氏子男二鏌銓皆早卒今以姪鏹為嗣女四童應方
瑒郭昱其壻也一未行孫男四琨珂珪玉公之葬也國
子司業陳敬宗銘之鏹以太常卿孫時所為事狀介監
察御史包德懷來請文書墓碑公于余往還最故故不
辭而為之書銘曰

肅肅蘭臺邦之司直耳目所寄綱紀攸植彰善癉惡激濁揚

清惟平惟公惟廉與明君子在位表範正軌任或匪人波頽草
靡卓卓邵公秉潔懷貞不矯不隨特立獨行明習博識外方內
恕爰舉大要簡畧細故歷試三司成績有聞于江于閩
提憲大藩善類鬯舒不善斂避氷蘖之存去猶始至進
秩南都百度復貞用賢任能惟天子明昌不期願長輔
聖理發潛有詞庶其不死

甄氏先塋之碑

甄虞舜之後因陶甄以為氏在東漢曰宇講授春秋有

行義在江左曰彬曰恬在唐曰濟皆以行義稱在宋甄氏數舉進士有聞曰秀始居忻州定襄其後科名宦譜代不乏至曰海官於蜀宋亡歸隱過鳳翔岐山樂其山川風俗遂家焉五子其諱世安者又徙麟游所居在唐九成宮之西世安娶劉氏二子櫟允中允中元季為禮部主事既內附為遼陽都衛經歷改戶部軍儲倉監納櫟娶王氏一子仲得娶馬氏四子儀簡評詞儀洪武中舉鄉貢為戶部主事陞長沙府同知永樂初調嘉興

府復調順天府秩滿順天之民奏乞留從之陞順天尹
洪熙改元追贈其祖考考皆正議大夫資治尹順天府
尹祖妣妣皆淑人遂進儀兵部左侍郎儀惟累世緼德
務善用克膺茲光寵不敢泯沒將樹碑墓道昭示後子
孫於無窮而屬文于余余於儀聯官不得辭則求其先
之德善儀言世遠者弗能詳所知者高曾以來家世相
承男務詩書外治農圃及其時壯與少畢出力女勤蠶
績各有儆飭不待督勸歲所入擇善者獻于公乃自用

尊卑外內無相踰養老慈幼祭祀賓客皆盡其分之當
然平居未嘗忘憂勤艱難之意無侈習無外慕蓋至于
今不敢渝余聞儀言敬嘆曰嗚呼此其猶有豳岐古昔
之遺風也歟家之德善孰有加此乎今人率重儀溫厚
謹實所至得民非其有所本歟則著其本以範其後於
余宜也甄氏自儀高祖以上葬岐山義豐里曾祖以下
皆合塋麟游西山之原其中之墓曾祖考妣祔于左祖
考妣祔于右者考妣也儀有子四人鼎鴈銍銘曰

緊甄之先聖啓其源後有續承行義與文其在定襄代有
仕者暨宋鼎遷來徙岐下有田有廬義豐之里五桂駢
芳麟游再徙積厚累仁韜輝含章沿于孫曾燦燦厥揚
踐歷中外有操有施陟佐祁父厥施逾大帝嘉所自霈
之德恩華褒崇秩敷育九原戕戕之丘序左與右轟轟
之石式表緜久春秋霜露來者雲仍永念爾祖視茲刻
文

詹事府少詹事兼翰林侍讀學士贈嘉議大夫

禮部左侍郎曾公墓碑銘

天之生才甚難也然高明強毅宏博奇偉智能勇畧之士世未嘗乏用惟文章者不易得夫探造化之閎徵帝王之法通古今之賾渟瀦融會而後出之上焉者發揮性道修正人紀此聖賢之事不可幾及次焉者推明義理紀述功德作爲風雅以鳴國家之盛司馬遷相如揚雄班固韓柳歐蘇作者之事然亦代不數人焉信乎其難也國家自洪武以來有文之士其可以嗣遷固者蓋

有之矣太宗皇帝御天下慨然欲作新人才興起斯文而龍飛第一科進士中簡明秀通敏者二十八人就文淵閣盡出中秘書俾進所業朝暮大官供膳月給內帑鈔爲膏火費蓋期之于古人曾君子啟其首也君名榮時以第一甲第一人授翰林修撰授承務郎遂晝夜淬礪文與學俱進上時召試子啓迅筆千百言立就不費思索而理致文采皆到其苦心思索者有不能及上屢舉羣書隱僻事以驗所學靡不悉對以是深見獎重遂

名聞天下明年修永樂大典為副總裁五年陞侍講授承直郎七年扈從巡北京數侍燕閒應制賦詩並荷褒嘉後有薦文士於上者必問得如曾榮否卒之考其能未有庶幾跂及者陞承德郎預脩太祖皇帝寔錄十一年復扈從巡北京十二年考北京鄉試十三年廷試克讀卷官寔錄成賜鈔襲衣文綺十六年考禮部會試陞侍讀學士授奉訓大夫修天下郡志為副總裁二十二年考禮部會試仁宗皇帝嗣位陞左春坊大學士仍兼翰

林侍讀學士日以經史進講文華殿從皇上之南京還
預修太宗皇帝仁宗皇帝實錄宣德二年考禮部會試
五年充廷試讀卷官兩朝寔錄成賜金織襲衣銀幣陞
詹事府少詹事仍兼侍讀學士賜寶帶子啟為文章如
源泉混混沛然奔放一瀉千里又如園林得春羣芳奮
發組繡爛然可翫可悅賦詠之體必律唐人興之所至
筆不停揮狀鳳之工極其天趣他人不足已嘗有餘四
方求者無間貴賤日集庭下靡不酬應一時文人所作

碑碣記序表贊傳銘詩賦流布遠邇蓋未有如子啟之
富者工書法草書雄放有晉人風致自解大紳胡光大
後獨步當世儀貌魁偉襟度坦夷而神情洒落善譚論
簡而有味良辰清景擇勝而遊未嘗以事廢其天性孝
友慈厚喜獎拔士類交際有始終之義急人之急無論
識與不識平生以及物爲心使之臨民必有所濟惜其
仕三十年恒以文學在侍近所及者未廣也素有痰疾
一日侍朝疾作遽引退上遙見之勅免常朝宣德六年

冬疾大作命太醫視療明年正月廿一日卒訃聞上為悼惜贈嘉議大夫禮部左侍郎遣侍郎章敞賜祭命有司營葬給舟還其喪朝臣自公侯尚書以下皆臨奠春秋六十有一嗚呼人才之難成一代之文人如子啟何可多得而今已矣蓋悼惜之無間言云曾氏世家吉之永豐其高祖晞顏宋兵部侍郎江西湖南安撫使元贈武城伯妣蕭氏曾祖巽申元應奉翰林文字同知制誥兼國史院編修官與其兄翰林直學士德裕皆有盛

名于時妣胡氏祖如瑤集賢院司直妣周氏考叔本洪
熙初以子啟貴贈奉議大夫左春坊大學士兼翰林侍
讀學士而贈其妣張氏宜人其配鍾氏封宜人子男三
秬務學力文有志繼述甫冠而卒薦紳惜之次積次种
女五鍾公鉉劉敦會周秀夫胡顥勉高欽夫其壻也公
之易簀也以身後事屬建安楊公及余楊公既為著葬
銘余為書其墓石而係以詩曰

鄆出有夏少康裔曲列啟封國為氏去邑為曾適魯仕

成國聖學述傳義親承素王道統系後十餘葉新莽際
爰以闔宗徙南避宅盱與吉心洙泗章逢蟬聯如擲比
歐陽之鄉吉之委宋元連縣起祿位天啟文運赫昭睎
公奮而興屬隆世天經煌煌表人瑞彰纓垂組侍廷陞
操觚含毫應帝制岷江茫洋萬里勢春空澄明雲錦麗重
瞳回矚天容霽紀功述德封金匱操執權衡品文藝宏
章大什耀海內朝陽和鳴鳳翽翽儒林翽翽拔其萃矜
惻焚溺懷惠濟惟仁攸存未弘施沒奚憾兮此賁志

故亞中大夫寧國府知府陳公之碑

公諱灌字同故廬陵城北吟溪里儒家祖以章父大經
皆以學行重鄉里公生數歲而孤事母孝時已卓卓有
鉅人志讀書一目數行而穎悟絕人族長老器之爲延
師教之師不能應所求往往引去然益自砥礪嚮進既
冠睹元綱日壞私憂世且亂去習兵法環所居皆良田
築爲場圃而樹木焉人初莫測其意數年木鬱然行列
而四方寇盜蜂起遂慕義勇以保障一鄉日屯聚士馬

而號令指麾於其間隱然一良將其教練有方撫綏有
道人爲用時江西諸郡多陷于寇環其鄉數十里獨
賴以安者七年然志在保境而非有所圖利也陳友諒
既據江西其將熊天瑞者強禮致公與俱至九江公睹
陳氏不足有爲也去之甲辰春太祖高皇帝克武昌公
因弘文館學士羅復仁詣軍門上謁高皇帝與語奇之留
帳下數日公力陳救亂安民之說悉見聽納遂擢湖廣
行中書省左右司員外郎是冬入朝改中書省左司都

事遂陞郎中明年陞大都督府經歷大將軍徐達北征以公贊軍事既克泰州留公督築城之役不旬日竣事朝廷遣使勞之命總制真州軍事丙午春除寧國府知府階亞中大夫下車首詢民隱爲興利除害增修先聖廟建學禮致師儒以教俊秀士習一新建祀典祀壇及驛館有廢皆舉爲條格革蕪并之俗覈欺隱之籍朝廷取其戶帖一事行之天下宣城民田瀕江化城等十六圩故堤峻薄遇衝決則水傷禾稼壞道路歲以爲患公

親爲規畫築堤廣厚加舊數倍又伐巨石作水門以時蓄泄民至于今賴之宣歙二水暴溢平地猝數丈民危懼計無出走致巫覡禱神水勢益甚公曰巫覡焉知事神躬禱于敬亭山神水患遂息所轄宣城諸邑踵元季之弊歲民租無入官廩率書虛藉公至有發其事者於是典司者皆怵怵懼得罪公私念此特循故弊弗革耳非始造奸也颺言於衆曰吾以某月某日行視邑廩蓋俾得爲計及期邑廩皆寔而弊亦革有強盜四十八人

以刼舟麥當死獄已具公聽其辭曰此愚民因舟漂抵岸而挺引取之非素有合謀安得四十八人悉同法府佐幕初皆難之後卒如公議坐先取者一人餘從減論公風采凝峻訟者至庭片語之下情偽莫遁故人咸畏服而其爲治務寬厚崇禮教鮮失所之民三年政化行焉既得代當去百姓耆老壯少皆有戀戀不忍之意代者山東鞠騰霄素負才不讓觀公所設施嘆曰吾徒當守而勿失也是年夏奉命督軍餉詣北平民胥悅趨事

又明年還京師省臺達官相知者爭欲薦於朝公皆力
辭遂謁告歸省先墓割田三頃建祠堂作義塾以訓宗
戚子弟居無何被召至京師未命卒於旅次洪武四年
某月日也享年四十有七公秉清介之行重義輕利族
姻鄉鄙遺乏有急並赴濟助間遇朋舊憂患狼狽倒囊
周之雖屢不厭非才行無有者歟子男三廓卓坦孫男
三誠謹謙皆稱公之後坦尤忠信務義公沒將六十年
坦介越府長史周君忱求書公平生于石余於公同郡

知慕公久遂考長史所為公傳及以聞諸鄉之君子者
叙次之而係以詩曰

猗嗟陳侯瑰璋踔絕才邁羣倫識亦閎達越在童冠鉅
志疑疑有書有劍萬衆奚敵罹時孔棘衆懷兢兢奮庇
其鄉屹如堅城孱弱盜名掉臂去之天之所興稽顙來
歸軍門之言數臣之忠惟聖聰明日照海容簡其才猷
以贊政府匪直裨文亦既輔武宣城名邦寶帝之畿嘉其愷悌
以寄嫗嫗植之黍稷薈其狼莠民曰陳侯汝子父母仁以為育

義以為教民曰陳侯汝時杜召遺惠在民永思無斁遺澤在嗣
世率于德猗嗟陳侯惟吉之英吉世有人視此刻銘

故嘉議大夫大理寺卿虞公墓碑銘

公諱謙字伯益姓虞氏虞之先家河南陳留代有仕籍
宋諱南者從高宗南渡遂家金壇世業詩書南六世至
文生仲仁公祖也祖母徐父德華母周以公貴祖父皆
贈嘉議大夫大理寺卿祖母母皆贈淑人公自幼秀朗
端重異常兒聰敏好學洪武乙亥由太學生擢刑部

山東司郎中授奉議大夫陞杭州知府授中順大夫太宗皇帝入正大統召為大理寺左少卿授中憲大夫永樂己丑車駕巡北京時仁宗皇帝監國奏陞都察院左副都御史授嘉議大夫甲辰轉大理寺卿公自少壯有志世用既仕恪勤夙夜務盡職分持大體恒曰為臣之道愛君愛民二者愛君崇其德愛民厚其生初為郎中己駸駸起時譽在杭州嘗建議僧道民之蠹今江南寺院田多者或數百頃而官府徭役未嘗及之貧民無田

往往爲徭役所困請爲定制僧道每人田無過五畝餘田以均貧民初是之已而謂非舊制遂寢爲大理少卿都察院論誑騙罪準洪武榜例梟首示警公奏言比奉詔書自今準律斷罪誑騙在律當杖而流梟首非詔書意上曰虞謙言是竟從律天津衛倉災焚糧數十萬事聞遣御史廉視還言主典者盜用多故縱火以自蓋追逮幾八百人不勝考掠皆誣服應死者百餘人餘坐徒流公察其寃卒白于上得減論於兩法司具獄及四方

所上獄議必親閱之必當必平于大辟罪尤加意曰彼無憾斯我無憾矣為都御史嘗奉命巡視揚州淮安徐州旱災至則䟽民所苦請發廩賑貸又請官贖還所賣男女為奴婢者皆從之又奉命督兩浙蘓松諸郡運賦輸南北京及徐州淮安先是富民賄有司率得近地而貧民多運北京公建議為四等丁多而糧最少運北京丁多糧少次者運徐州丁糧俱中運南京淮安丁少而糧多存留本郡縣倉又言兩京往來官員軍民商旅舟

聚徐州呂梁二洪動一二月不能進者請每洪增夫二百人協力挽送如例給月糧仍官撥牛每洪一百分畜近洪民家間暇聽民以耕大舟行則用挽之亦皆從之又督運木道潁州陽武陸行下衛河以達北京所督軍萬餘公節其力而厚撫之人不言勞會夏暑疫役者多病公曰此聚之過密宜疏暢之遽命散處之病者悉起奉命巡撫浙江察廉糾貪因建議便民十數事多見施行仁宗皇帝嗣位於刑獄尤隆欽恤而嚴大理之選曰

是天下之平也於是大理寺卿闕遂改公爲卿時有詔
求言公上言七事其一用人曰用得其人則治道興非
其人則治道隳人主之職惟在擇人而已二興學校曰
教育之道本于師範今內而祭酒司業外而郡縣學官
不在于備而在得人庶有成效三曰都察院耳目綱紀
之職用以激濁揚清雪理冤抑今專俾治獄非朝廷設
風憲本意四曰廣儲蓄今國用空乏宜預為備五曰北
京八府之民困于養馬極矣宜分給無馬郡縣牧養以

蘓轍內六曰鈔法不通其弊原於出多而入少今但多方收之而不輕出民艱得鈔則自流通七曰京師盜賊之繁由軍民襍處官司不便管束隣里不相通知今固不能遽釐正之宜勅五城兵馬司於各坊街巷不分軍民工匠每十家編爲一甲使互相覺察出入一家有犯十家連坐有能捕首免其連坐之罪庶輦轂之下可以肅清皆切中時務蓋公于爲臣必思盡其所當然者一日朝退得風疾上命醫往視賜藥歷半歲竟不起宣德

二年三月廿四日也訃聞賜祭給舟還其喪命有司治墳其生以丙午歲正月二日享年六十有二其居家善事父母父母歿喪祭咸盡禮於其弟友愛與人處溫恭怡怡其儀觀偉然風采凝潔瀟灑絕俗也其文章以詩名於時所著有玉雪齋稿若干卷喜寫山水木石幽澹簡遠有倪雲林韻致嗜蓄法書名畫邂逅心之所好輒贈不靳其配江氏封淑人其子男三禎祥禔女五皆適士族孫男二士奇于公素相知嘗為序其詩以傳其未

易簣也語其寮王邦彥楊遂初及其長子我死必揚君銘
我不憾矣然及我未死而言也二君馳以告余愕然驚曰
何遽及此乎而不敢辭敬諾焉又明日公卒匍匐往哭之於是禎
奉遂初所狀事行來乃叙而為銘使刻於墓石銘曰

虞氏所始啟封自姚亦有自姬啟於東吳沂厥本源匪
王斯帝沿漢及唐屢顯于代朝歌之武永興之文奕奕
振振嗣休續聞金壇之宗繇陳留徙縕義積勤垂三百
祀奮挺以騫始伯益甫升藝登材肇迹郎署往撫臨安

古二千石帝謂爾良可付以辟棘寺蘭臺歷年孔多
惟中弗倚惟平弗頗使車載馳顧視在道有隱于心敢
稽入告惟天聰明曰汝予諧汝克予遜予奚汝違祗于
列聖薦終猶始有懷惓惓未究厥施莫致而至夫豈在
人嗚呼伯益君子之存

故翰林檢討陳君墓碑銘

仁宗皇帝初臨御獎用儒術茂興文治首命在廷舉
賢薦能于是少保臣士奇言蘇州陳繼其文學宜在侍

近即日詔驛召之既至授國子博士明旦入謝改翰林
五經博士時初建弘文閣于思善門之右以儲經籍備
訪問而命翰林學士楊溥董之擢侍講王進及繼等三
人副之令上嗣大統詔脩兩朝實錄簡用纂修官而繼
預焉無幾賜勅命實錄成賜白金及織金文綺衣遂進
檢討宣德七年五月自陳老疾奉命致事歸又明年疾
加遂不起五月某日也於是其子完走北京求文書墓
碑嗚呼斯文老成凋謝殆盡士竒忍以衰病而忘情老

友哉按其學者大理評事張益狀陳氏其先家蜀與宋
文忠公堯叟同祖堯叟從父諱鄴始徙南康之都昌七
世至諱篆登宣和六年進士乙科累官左朝散大夫明
州通判再徙星子又五世至諱洽咸淳貢士貢士生元
翰林待制諱仝待制生諱徵受學臨川吳文正公為通
儒至正間廷臣交章起之將授之官以介特不偶自引
去又徙蘇州之吳縣娶宋相江文忠公萬里之孫生諱
汝言博學有才具洪武初仕為濟南府經歷所設施

秩然條理一郡倚重大將軍出師道其境深見獎重娶
吳氏初生三女經歷公方以嗣子爲念在濟南一夕夢
白衣大夫已而生男即檢討也初名釋童更名繼字嗣
初晚號怡庵嗣初生十月經歷公沒母抱之歸蘇家具
蕭然惟存書二萬卷及蔬地二十畝其母知學問謹禮
法守節不嫁以教育遺孤嗣初稍長克自奮勵其天資
明果內奉母訓外從良師日益見端緒又進而從明經
師遂深于易詩又求邃於古文者而師之其爲學自經

史百氏皆博考深究久而淹貫沛然爲文章根義理辨
體製嚴矩矱力去陳言不肯苟率由是聲譽蔚然見重
於三吳求文者接踵戶外而從學日輻輳講下其施教
有本末主敬為要明理為務後在館閣於商確古今講
論述作之旨娓娓皆有所自衆推服之居家薦孝行雖
貧而講授之暇躬治蔬圃以資養甘旨恒充有司上其
母貞節詔旌表之自是遠近交聘嗣初學官一以親老
辭親沒葬祭盡禮與人交以誠善者獎掖之不善者面

警飭之不肯媿媿苟容窮乏者賑給之沒無歸者歛葬之雖官於朝其志泊如蓋未嘗一日忘幽閒之適既得請歸吳中之學者皆忻忻喜得所依而從游者益衆既疾革門人請所欲言舉西銘存順沒寧語荅之遂卒春秋六十有五其卒也族姍門生故舊皆臨哭郡自守貳以下咸走吊祭遠近大夫士聞之皆嗟嘆悼惜其所著詩文有怡庵集四十卷藏于家其配故蘇守金綱之子儉勤克孝先十二年卒子男五宗寬宏宣完皆志于學

女二長適謝璜次在室孫男七傳儀仁偉佃信備女四
其葬在縣之太平鄉薦福山之原銘曰

有碩其先自陳宗室派衍於蜀英傑森出沿江而東來徙南康
再徙闔閭代有奮揚卓乎怡菴克奮于孤幼志桓桓壯夫莫踰
有書充棟有畦遶宅晝鉏夕誦孝養是力浩乎其學邃
乎其文求道請業從游說說辟書駢來親養弗舍晚而
幡然玉堂金馬抽思發才效勤紀述長簡鉅冊金匱石
室冲澹之存食息靡忘引疾謝榮端復于鄉邦有耆俊

如璞如石山林草木光輝潤澤奄其永逝士林興悲紛
彼媚學倂倂奚歸刻詞墓前式示來者尚有懷德車過
斯下

君山廟碑


君山廟者祀常州府同知張侯之廟也為政而能愛民
生則父母之沒則蒸嘗之皆由其誠有以致之也張侯
之同知常州也奉部符專督農事既至視民如子喜為
之興利常行視水教之蓄泄躬履龍畝察種植而為之

勸或時坐膝間相爾汝語如家人未嘗詈詈辱人遇老
病鰥孤率有恩意所過飭勵學教正士習民甚戴之上
官知其得民也有所賦輒檄之督民恐以緩累侯則爭
起趨事然侯終不以慮譴而急民是時天下軍伍滋弊
軍之姦黠者率用賂規匿而詭傳平民於籍民被枉比
比朝廷以璽書分命御史清理其要在覈姦直枉御史
當詣蘇常者言于兵部常州必得張同知共事乃有濟
部遂以檄侯御史時銳意得軍爲功不復矜念民枉

侯固執民寔非軍敢違璽書不從御史不可奈何數出
無禮語詬詈之侯忿鬱不能平數日疽發背卒然常
之人賴侯以免于枉者猶十七八時蘇之佐郡者極力
助御史得軍而枉民動以千計愁苦嗟怨於道路累年
不解常之人以是益思慕侯不已侯素淡泊廉介不苟
取一毫自入仕未嘗以家累隨公退坐一室蕭然讀書
焚香而已易簣之先夕侍藥者入其舍索燈燭悉無起
出取膏油一盂以入侯遙見竟謝卻之其操類此侯先

自翰林庶吉士爲刑部主事春坊中允大理寺丞皆有政績嘗奉命督事廣東福建皆有惠及民此特載其在常者耳侯卒之日民老壯奔走哭於庭皆哀具儀奠祭累日匱行白衣冠送者數千人非積誠而能致此乎後數年江陰士民朱善繼善慶周孟德孟敬因衆民之志協謀作廟于邑之北君山以祀侯來請書于石併作迎享送神之詩使歌以將事侯名宗璉字重麗江右吉水人永樂第一科進士朱氏周氏皆尚德崇義之家詩曰

肅穆兮侯堂酌山泉兮薦林芳泠泠風兮髣髴侯戾止兮
佩玉璫懷仁侯兮撫我動與息兮有教稼芄芃兮連疇
侯顧我兮樂以笑侯乘兮蘭棹修東臯兮忽南畝溪有
鱸兮陸有虺侯赫視兮敢余民侮侯來遲兮逝何疾侯
之逝兮我民以戚山之明兮水之麗侯捨茲兮安適侯
懷故鄉兮旦往夕來祚我祐我兮無遐遺調二氣兮平
四序下無汎濫兮高無曠災沼有魚兮豈有畜公無負
逋兮私庾足我民兮子孫孫子承侯福兮千百世紀



東里文集卷十四

欽定四庫全書

集部

東里文集卷十八至

詳校官檢討

臣羅國俊

中書

臣劉源溥覆勘

總校官進士

臣楊懋珩

校對官主事

臣張培

謄錄監生

臣華春芳

欽定四庫全書

東里文集卷十五

明 楊士奇 撰

墓表

香山縣丞彭公墓表

嗚呼古人所與共治天下者必擇士而任之凡内外大小百執事之職非士不與是以職修而治興後世雜刀筆吏與士並用至有謂士迂闊無益於世者夫爲士而不知道知道而不適用誠無益於世然取士亦察於其

內何如焉耳可以什一遂廢千百哉若今香山縣丞彭公出乎士也其所以修於身施于人者皆有以發明斯道士果無益於世哉公諱豫字與志一字叔介吉之泰和人其先徙自長沙宋寧宗時曰惟孝詣闕獻賦周丞相必大楊學士萬里謝諫諤交薦其才得官不受而去公之七世祖也祖某父某公自幼已岐嶷異常兒稍長讀書知以明道爲務初吳文正公以性命之學授虞文靖公文靖公以授鄉貢進士安成劉雲章先生公往

從學雲章先生久而益有所得雲章先生歿益嚴奉先生之教動息語默必由於矩度澄心玩微手不釋卷茹素飲潔慙慙自足非其人不接也一時流俗亦皆目公倔強乖刺公既孤特寡偶而持之愈堅南雄守嘗辟公教官金州守奏公才行可用徵詣京師皆以疾辭後數年始就聘萬安訓導以上書言事擢香山丞香山在嶺南海島之間地遠而俗囂前之爲縣者率尚猛治公至一務寬施訓以善道久而民益化服緣海諸衛屯兵暴

橫爲民害往往擇民膏腴田誣以荒廢據占自利郡縣不能制公獨毅然曰此細民所資以共公賦給私家者且奪民欺上著在國典有不還所侵田必執不貸兵知公不可犯聞所言悉還之縣有大猾恒持長吏短長搖撼以騁前此縣長吏皆縮手不敢詰公悉捕寘諸法奸宄斂跡海寇常劫掠民婦女貨貨出沒儵忽不可蹤跡民苦之公爲方畧教民掩捕訖公去寇無入境者瀕海歲旱衆禱不應公自外來曰豈有爲文具而能格天者

乎即自齋沐致禱越二日大雨霑足明年復旱公復禱
雨亦如之縣民舍火且延及官廨公叩頭嚮之反風火
滅民習不樂學雖已久立學官生徒廩食十數年有不
能通知語孟章句者公稍暇即詣學督視諸生為之啟
諭誘掖不數年有與賓興而登仕者民始知學之貴在
官六年年已七十以老疾乞致仕既得請未行某月某
日卒于京師永樂六年也明年某月某日葬某里某原
娶某氏繼室某氏皆先卒子男一某孫男若干某某公

居家事親孝執喪三年不御酒肉人未嘗見其啟齒待族人
有恩嘗嫁孤女振貧乏皆曰此在我當然性簡淡無他嗜好
惟寶愛其宗譜與先世手澤文字踰於拱壁嘗語其子若孫
曰知愛此則能愛身矣聞有存其先世及劉雲章先生片文
隻字雖百里外不以寒暑奔走求錄遇鄉人子弟必教之禮
義忠信嘗以歲更長繇賦里中教里民復其所生之姓者數
家民貧不能輸賦竭已力代之輸不責償焉蓋公之所爲厚於
民者初不待香

山而後見已如使公之見用不止於香山又使士之用
世治民皆如公之香山士之效豈不暴著於天下彼不
爲公者不足言而公僅止於香山而已嗚呼惜哉余故
論次公平生大槩表諸墓道以告其後之人而亦豈獨
其後之人之當知哉

工部屯田主事郭君墓表

君姓郭氏諱原琳字貢仲郭氏萬安下驛里名家其先
居泰和城西後徙龍泉之金田至繼之徙下驛又至如

村晴川昭明貢仲之曾大父大父父也昭明敦厚有行
洪武中禮部侍郎張衡薦其材於朝徵至援例得歸娶
泰和陳氏生二子貢仲其仲也體貌魁偉而淳厚坦亮
外和內莊喜愠不見辭色未嘗舉口及人過失蓋望而
知爲厚重君子也孝友行于家忠信徵於鄉從永豐唐
斐先生受詩經爲太學生居無幾告歸養親後十餘年
終親喪復還太學遂擢工部屯田清吏司主事居官不
嚴而肅莅事以勤待下以恕凡所董治事必先集冬官

卿及其貳咸禮重之下之人皆樂爲之用不肯欺之三
載考覈奉命徵薪炭山東時山東歲屢歉貢仲一意綏
撫未嘗督責之民更感激趨事是時奉命徵物山東不
下百餘人而以清謹寬厚稱裁三四人貢仲其一也永
樂壬寅六月廿三日以疾卒於長山縣官爲斂殯之而
發視其裝無所有唯所齎公牘及遺訓其子之書而已
享年五十有六娶張氏子男三楫矩淵女一嫁羅仲鈞
孫男女各四楫淵以其卒之明年走長山啟殯歸葬於

鄉而楫來北京以翰林脩譔魯鶴齡所述事狀求余文
表墓嗚呼貢仲吾姑夫陳白石先生女兄之子總角讀
書依舅氏往還與余好也既長睽隔不相見殆三十年
始再會於南京貢仲爲人簡澹未嘗一涉跡達官之門
雖同鄉郡識之者無幾人而閒暇輒過余或留止宿譚
論以樂不厭也來北京僅一見而有山東之別夫孰計
其遂永訣耶貢仲之賢且材無所施不宜又孰計其竟
止於此耶抑造物者之意與民之所欲惡異耶不然何

奪吾貢仲之遽也吾因之又有感焉萬安之賢而材如
張衡之清峻彭與明之廉慎郭士道之剛介其達也皆
有以及人雖衡仕至少宗伯與明至大理丞士道至京
尹皆達矣而皆不久而遂卒吾與貢仲語蓋未嘗不共
嗟咨悼惜之而致疑於造物者夫孰計貢仲又奄然遽
已耶則余於貢仲之沒不能忘情此三人者亦貢仲之
意也

歐陽允賢墓表

允賢諱賢歐陽氏也仕至南京國子助教永樂壬寅十一月
初三日卒於官其世家吉安泰和邑西蜀江里其
先與文忠公同出吉州刺史琮其曾大父孚先大父以
定父觀瀾允賢洪武庚午以書經中江西鄉試明年會
試中教官選授嚴州府學教授居無幾丁內艱服闋改
興化府學教授永樂元年陞國子助教其爲教授嚴條
約以勵諸生一時學校之爲師弟子者率棄本無實而
記錄舊文以資進取傲幸得之而既懵於學術往往不

見重於世允賢恒旦暮衣冠坐講堂中取四書經傳為諸生解析反覆使達於本原然後以其所得發為文辭而為定其可否在太學亦然允賢兼通詩春秋論說之際諸生非其講下者皆樂就而聽焉有疑未通者皆往質問允賢亦樂為之傾寫蓋自祭酒司業以下咸禮重之而祭酒胡公遣子從之學太學生之始至者素已聞歐陽先生亦多願從之助教九年考最復職者皆援例自陳得陞眾謂允賢蓋自陳曰吾嘗戒學者宜安命乃

今自蹈耶卒不自陳於家有孝弟之行爲人坦夷直諒
遇事是是非非亦喜爲人解紛排難文章取達意而止
嘗曰刻深藻繪非吾所長亦非吾所願也邂逅朋儕知
已相適竟日忘返而講論道德之餘其志未嘗不在生
民憂深思遠之意每溢出言表蓋聞者鮮不迂闊視之
嗚呼豈其然哉允賢德足以惠民量足以容物明足以
燭幾公足以爲政蓋無施而不可惜乎其一教官而止
也雖承允賢之教者於爲邑爲郡爲藩不少矣考夫足

以發其道而愜其志者固少也嗚呼允賢可以易得哉
允賢卒時其父春秋九十有二康健無恙也而允賢僅
五十有五而止其命也夫其配贛州府學訓導劉一清
先生之女子男六湏哲蒲澗蒲淳蒲先卒女二長嫁蕭
九德次嫁康類哲類皆永樂十九年進士孫男三允賢
之葬也翰林侍讀王君直銘之矣其弟監察御史和在
京師求余表其墓余交允賢尤久之尤深其沒也尤
悲之故最其行與志之大者使歸刻焉

故國子博士王君墓表

北京國子監博士王復原字子復洪熙元年九月某日卒於官既歸葬其鄉吉泰和澠江里其子韶勤復走北京詣余拜且泣曰先子之藏也侍讀學士王先生爲銘掩諸幽矣不肖孤竊念世盖有生不霑一命行不加庸衆人率得名望貴人表揚於不朽者先生不肯尋常苟有論述而先子亦嘗以經術用於時列於朝矣表墓之文非先生其奚屬敢布其哀懇余曰嗟乎子復吾友也

其沒也吾哭之慟宜其子之於我乎屬也王氏家泰和之西鄙世業書詩爲儒師自其祖父以上皆不仕父志德積善蚤喪子復雖少不以孤窘而怠於學晨夕寒暑自策勵稍長聞同郡謝子方先生深於易裏糧從之謝講下生率常百數十輩而馳騫文辭進取之習得其支葉者爲多若用志沈潛必探求本根者僅十數輩子復其一也子復是時已日有負挾出圭角謝先生亦竒視之洪武丙子選江西鄉試第七後四年會試禮部選教

官第一授廣東化州學正時嶺以南郡縣學比比乏師
子復盡心其職化州之學者始有所興起而浸漬及其
旁近縣學亦多九載用績最超陞北京國子監博士更
鏹削鋒銳爲和易又九載以最陞七品祿仍博士職預
脩五經性理大全諸書書成受厚賜及脩太宗文皇帝
實錄詔簡有才識通史學者館閣擬子復未奏而子復
得風疾遽不起子復爲人儉約真率無崖岸嗜爲文章
在監學十餘年求文者日接踵戶外未嘗有厭倦意所

著文集若干卷藏于家享年若干二子即韶勤皆有志
于學嗚呼王氏於余還往之厚者子復及其弟敬先敬
先爲人率直闇爽惇義薄利前三年敬先沒于蜀余每
與子復追憶之而悲豈謂於今又悲子復也則余之爲
此文也友道之感何獨子復哉何獨子復哉

贈徵仕郎戶科給事中夏君墓表

錢唐有處士曰夏仲寔沒十年矣宣德三年以子時貴
贈徵仕郎戶科給事中時奉前詹事府少詹事鄒濟所

爲仲寔葬銘因中書舍人許鳴鶴求表其墓仲寔諱忠
本王氏子所生父士祖母夏氏生三男子其仲仲實也
外祖某舅某皆無後父母命仲實爲舅後承外家之祀
遂氏夏云有孝友之行少時所生父母病聞人言割股
食之可愈每割股煮液進之父母沒皆哀毀治喪祭盡
誠斥去一切浮靡無益之費處兄弟恭愛待族人有恩
或導之復王氏者慨然歎曰豈非篤我乎禮哉顧先考
妣治命敢背棄乎王氏宗子在而先妣之父母與兄莫

爲主祀者矣我夏出也彼其有靈庶幾尚於我乎感通而忍委去之乎乃已仲寔淳厚簡靜樂儉素治家能肅恒勤事以率下交朋友信處鄉鄙謙遜怡然犯而不校力施濟以守善自名晚喜老聃氏書終日玩誦不厭盖年五十有五而卒其卒以永樂十七年十一月三十日娶陳氏封太孺人子男四長即時舉進士爲戶科給事中溫厚端慎爲縉紳所重次敏次遜次觀女三孫男三女四嗚呼世之騁智巧角聲利奔走馳騖惟日不足欲

爲無窮不朽之圖卒之一旦與草木同泯滅不能有毫
髮可以飭躬而裕後者多矣若仲實非有蹕絕之志能
邁倫之材勇謹謹焉蹈善務義以終其身生有令稱沒
有餘慶其相去遼遠不待明者可知然所趨率在彼而
不在此何耶如所趨率仲實亦奚必明法律張吏治而
後可以興理耶故爲表之以勸

樵雪居士墓表

江陰縣學教諭陳孟旦來北京以其姻家子王熊所狀

乃祖樵雪居士世出事行求表其墓余覽之而歎曰嗚呼此吾故人也其平生風流文采雋爽闊達楚楚出輩行今可復得哉王氏家泰和邑東一舍外梅岡之麓其先長沙人南唐時有爲法曹於吉州者留居廬陵甲村數世徙梅岡至諱某號約齋者兄弟皆有科名於宋約齋與文丞相厚家有萬丈樓蓋度丞相之書云又四世至道濟博學工詩賦不慕聞達日與賢士大夫游翛然出塵之韻也娶曾氏生四男子其季樵雪也諱環字伯

彰幼勤問學既壯有志用世已而歎曰柰何違吾親之
養而騫乎外哉其事親孝處兄弟敬愛從兄子朋清尚
絕俗至老恭愛尤篤一味之甘必共於宗族育孤莖貧
靡不盡心於鄉鄰周急濟乏雖數不厭嘗歲旱里人羣
禱久弗應慨然曰文具能感通耶更三日不雨未盡死
民則何望即自齋潔致誠露禱翊日大雨霑足晚益恬
於隱而嫉流俗之汙也自號樵雪居士縉紳儒生有過
邑東鄙而不之樵雪者率自意欲然而樵雪所交游皆

時聞人樵雪卒於永樂癸卯二月廿四日享年六十有九娶羅氏清湖名族有賢行子男二長三綱先卒次三紀孫男七熊其長也曾孫男女各二樵雪之塋以卒之歲某月日樵雪雖老書冊不釋手尤喜為詩歌自娛嘗一至南京莫夜過余時梁用之陳孟潔聞之皆來會四人者相見不復作寒溫間闕語輒論詩相傾寫酒酣放爲嘲謔夜漏盡二十刻未已終不片語及世事天未明樵雪不辭啟戶徑去嗚呼孰謂遂此為永別耶樵雪不

可復得而孟潔用之皆已去世顧獨余在雖未死亦何有裨當世耶孟潔用之墓皆余銘之樵雪之墓余能已於言耶

陳廷傑墓表

莆田陳廷傑儒君子也唐會稽王揆其所自出也宋吏部尚書仁璧其五世祖也龍門居士諱某蓮塘居士諱某其曾祖祖也元以書經舉鄉貢號梅岩諱某其考也林氏有淑行其妣也賢其諱廷傑其字安順翁其晚年

別字也色莊而氣和內仁而外方居心不欺致鄉有古道之號者其爲人也年十三聞其父艱危徒步裹糧走數百里從之備歷險阻卒奉父以歸父母歿時家甚貧能排衆人苟且之議而極力致喪葬之具於堅久至老死孝思不少衰者其誠于子職也爲學官率五鼓興衣冠坐師席講授竟日不倦夕乃息廟學圯壞必倡率繕完兩考鄉試必致其公召修永樂大典考閱讐校必究心暨老且病必致恭朝謁不廢者其誠於臣職也慟兄

觀持廉謹爲陝西叅政卒而官責其家償帑錢數萬緡
遂罄其室奩具代償以免兄之妻子於窮阨恤宗姻孤
者爲之育訓貧者爲之嫁娶爲之喪葬者其德之施於
內也守令有所咨政必輔諸厚鄉有顧掾者客于京師
雅相慕而未始相識顧一旦疾急屬左右必請見至則
顧已不能言惟數目床間囊意若有屬者爲探囊得白
金五十兩語顧曰爲悉致若子顧即瞑目後召其子歸
之子拜奉三之一爲謝不受南康邂逅嶺外人自京師

還以病爲同舟者所棄舁歸舍予飲食醫藥戒家人謹視之且移文其家不報竟死又爲治歛葬者其德之施於外也早從鄉先生治春秋明聖人筆削之旨歷究聖賢之書而力拒老佛者其學也於論著尚古賦詠尚選而家有困學箴抱拙橐聯芳集者其文也諭學者必務孝弟忠信真知實踐而講析必暢理者其所施教也結廬西山岩瀑之間以耕以學而時乘黃犢讀書消搖岡原之上者其初所栖隱也由莆田邑學訓導爲清河湖

口南康三邑教諭者其後所歷官也洪熙乙巳季春之朔北京文明門之旅次其卒之歲月日及處也七十有三其享年也方氏其配淮其子也淮所營某鄉某原其藏也士行修諸身施諸人無忤於先民可質於鬼神者其藏宜有表也循淮之請而述行以求表者其門生前章貢守張珂也

東阿縣儒學訓導黃先生墓表

東阿縣儒學訓導黃先生諱珏字某別字愴翁其先自

江夏徙南康之都昌宋隆興進士諱灝從朱文公受道
學國史有傳者其七世祖也元盛時與虞文靖范文白
游諱石者其曾祖也祖諱慥錢唐縣學教諭父諱景南
安道源書院山長母葉氏白鹿書院山長青叟之孫先
生生於元季兵亂之際稍長而端重喜學時舉家竄匿
巖谷中山長公愛之取瓦石書孝經論語授之手捧瓦
石誦不輟口十餘歲益有志而家貧然松明以繼晷盛
寒衣薄則擁衾危坐率過夜分乃寐金華朱悅道通瀝

洛性命之學而德行淳篤爲星子知縣先生從之游甚見許與傾底裏以授之朱官滿而遷裹糧往從卒業洪武乙丑縣令丞聘爲學訓導躬勤以率諸生而優柔化導諸生翕然起而從之後多成名以去益廣學舍加于舊規丁內艱服闋改上海縣學訓導尋丁外艱服闋陞南陵縣學教諭無幾調安東縣學徵脩永樂大典被旨試文章先生第一蓋將用之而以老疾辭大典成受賜賚復還安東其纂修居京師六年而安東之學者科舉

不及數考滿循例降訓導吏部侍郎師公審察一時教官學行無踰先生者遂奏授東阿東阿師公鄉邑也明年陝西布政司聘考鄉試又二年卒於東阿永樂壬寅八月二十五日也春秋六十有六娶高氏子男二森磊女一淞江布政司叅政熊本誠其壻也孫男二女一先生天資淳篤既傳其家學又得良師躬勤而弗懈於經史百氏皆究極旨歸尤用志理學而務實踐其事親孝親喪三年不飲酒食肉服除而哀不衰友愛諸弟與人

交久而敬犯而不校其儀貌儼雅而溫厚坦然端靜有容望而知爲有德者也恒語其學者曰昔文公先生謂我先人此心要日與義理相親吾未嘗斯須敢忘也洎於嗜欲布衣蔬食終身不渝惟好學之志自幼壯至老死如一日所著有鍾陵豪廬南集江海遺編在公志素行日紀其歸葬也祭酒胡公爲之銘曰不愧郭有道者吾友余正安尤知先生間以所述事狀及其子森來拜請表于墓而刑部侍郎張公亦告士奇曰吾東阿黃訓

導文行於今誠不多見宜必得子之文士奇與先生往
還十餘年其始識之翰林是時天下老師碩儒皆以纂
修召至而先生表然衆人之中前年從南京入朝行道
所經數千里所得府州縣學其師道之可稱者先生一
人焉耳恒竊自嘆師道立則善人多安得天下之爲師
者人人皆黃先生也則於表之誠宜而不復以辭

贈奉直大夫禮部祠祭員外郎易君墓表

易之先宜春人至宋禮部尚書祓徙潭州尚書孫遜卿

爲筠州錄事又徙上高錄事孫興國司戶仁則又徙萬載君之高祖也曾祖理祖俊父谷珍母彭氏三子長泰亨次震亨君其季也諱復亨字子謙自幼明爽穎悟未龔已知趨學日記誦過人長而益勤博涉羣書喜爲詩駸駸有造詣矣遭元季兵亂闔門竄匿深僻兄弟時出負米歸養倉猝道遇寇寇共目子謙儀貌而聆其論議知非常人衆強擁之去拜之曰吾儕迫於世難不得已圖自全而爲此也願屈公爲主謀策吾將惟公言是聽

公母爲辱焉子謙力謝不能不聽既不可脫則曉之曰
丈夫舉事當力用仁義救民水火庶幾可以得人心如
不務此而一志厲民禍敗隨之矣非自善之道也衆皆
唯唯遂爲所脅由茶陵至安福子謙睹其所爲無非剽
敍雖有言百不一聽一夕脫身獨走從間道去國朝平
定宇內其父已歿乃與二兄奉母歸鄉里而家業盡廢
毀兄弟辛勤拮据治田廬漸復于舊伯兄舉茂才仲兄
辟江西行省掾後皆坐累謫死子謙獨留奉母而教育

兄之遺孤男女七人皆成立爲畢婚嫁家日益裕築別業邑東塢溪之上有園林之勝名其奉親之堂曰壽護而躬勤孝養作書舍其側市書數千卷其中爲教子之資而自號塢溪樵者蓋將終身焉洪武中有司舉子謙孝廉以親老固辭母春秋九十餘尚康健無恙忽得疾子謙晝夜侍湯藥不去側夜屢焚香籲天祈母安母卒哀毀而居喪秉禮子謙爲人恭慎重厚能輟有餘賑不給凡於濟民利物事亦皆盡心邑歲舉鄉飲必賓禮之

歿於永樂乙酉五月十三日享年六十有四葬徐山之
原娶小圃龍氏益清之子性行慈淑族姻儀之後十有
二年四月初十日卒享年如其夫祔墓夫墓之右子男
三鑑鐔節女二長嫁辛軾次嫁陰陽訓術龍和孫男四
女六節永樂乙未進士授行人陞禮部祠祭員外郎宣
德七年蒙恩贈其父奉直大夫禮部祠祭清吏司員外
郎其母宜人於是節奉事狀求文表墓節自登第於余
往還其爲人溫溫淳實交久而敬不衰蓋觀節可知其

父況其父之存諸心見諸言行彰著若此者乎是宜表也

蕭坦行甫墓表

靖江府右長史蕭用道坦行甫既得痺疾奏乞歸鄉里便醫藥忤旨降宣府鵠兒嶺巡檢至宣府疾日益明年七月十四日卒於官永樂壬辰歲也先在靖江時自度疾不可起預爲墓志迨易簀之前二日取酒觴同官訣別又預作祭文自道其平生而寓夫全歸無遺憾之意

其可爲達也矣既歸塋于鄉後廿有三年其子暉來求
表墓蕭楊世婚姻家士奇與坦行甫兄弟在鄉里相交
好在京師同館舍今之知坦行甫者獨士奇深比五六
年士奇兩扈從巡邊至宣府經鷄兒嶺下馬入巡檢司
顧眎其山川景物黯然蕭條莽蒼而追思坦行甫平昔
志意未嘗不低徊感惻而繼之以涕淚也則表墓士奇
何辭蕭氏出南齊西昌侯叔誅之裔世家西昌邑西柳
溪之上其七世祖森宋衡山縣丞高祖古山曾祖靜安

祖方平皆通儒隱居終身父尚仁學者稱正固先生
尊爲經師嘗徵至京太祖高皇帝與語重之特授潭府
長史固辭除平涼府學訓導徙居邑北之栗園里元配
楊氏士奇從姑也繼羅氏生坦行甫初諱遵字用道後
以字行遂別字坦行云自少英特不凡負奇氣讀書日
數千言治尚書而諸經子史皆博通下筆爲文滔滔咸
有根據一時同輩莫或過之正固先生沒其學者皆就
坦行甫卒業後多舉進士去建文初詔郡縣舉懷才抱

德者吉安知府朱仲智舉坦行送詣京師試文章翰林
擢靖江府直史授承直郎時靖江悼僖王好學得坦行
雅敬重之所言多見聽用召入翰林脩類要太宗文皇
帝靖內難之師已渡淮在廷公卿倉惶失措坦行甫與
衡府紀善周是脩上書論大計指斥用事者誤國書下
廷臣及兩人議用事者怒盛氣以詬兩人兩人屹不爲
動左副都御史練安言國事至此尚不容言者乎顧所
論吾過有即改無則加勉詬者愧而止文皇帝既嗣天

位命翰林及王府儒臣考閱洪武實錄坦行甫與焉事
竟賜鈔時詔百司復舊制罷直史司爲諮議所改坦行
諮議無幾陞諮議所爲長史司遂陞右長史授奉議大
夫永樂元年從王之國桂林初至凡國中祭祀所需下
有司備其後凡祭祀之需府寮屬皆勸王下有司備坦
行曰初至倉猝不能自備可一行之不可以再且祀神
在致吾誠使人代脩物非誠況未請於朝而擅使民非
制乃止後坦行進表詣京師王府竟下有司脩祭物事

聞長史以下皆得罪王始悔不用坦行言坦行數言
於王宜務善納言以厚德奉法愛人以保福又啟陳八
事曰慎起居寡嗜慾勤學問養德性簡鞭朴之刑無侵
下人之利常接府僚以通羣情簡擇謹厚之人以備差
遣又作端禮體仁遵義廣智四門箴以進王問四門之
名遺信何也對曰五常之信猶五行之土實有仁義禮
智之德即信在其中王又問古今人多好名何也其意
以譏坦行之屢有言對曰君子必不好名名與寔譬諸

影與形有形斯有影有實斯名隨之矣河間東平皆有實德故其令名在世與日月同一悠久惟殿下勉夫在己之實耳凡於進講之際必反覆敷暢其旨坦行負直氣侃侃能面折人過失未嘗稍屈已求合一語不合掉臂去不顧而嫉脂韋軟媚人耻與同列事親孝以祿不逮養在公遇盛宴饌未嘗醉飽於族姻有恩於朋友有信義性澹素一繡衣入朝則服公退布袍蔬食不改處士時爲政達於大體所著詩文數十卷藏於家春秋

五十有五娶康氏繼彭氏子男六望肫肝眈眈宣
德二年進士吏部文選主事女四其壻嚴頤龍象楊鶴
羅溶象禮部祠祭主事孫男若干世之仕者巽慙不振
久矣蓋士以氣爲主而以理充之則無往不直考坦行
甫躬之所蹈位之所施其正直剛毅之氣可爲仁且勇
哉可爲仁且勇哉

東里文集卷十五